

臺灣文獻史料叢刊——第三輯

聖安本紀
明經世文編選錄

(合訂本)

臺灣大通書局印行

臺灣文獻史料叢刊

第三輯

(53)

聖安本紀
明經世文編選錄

(合訂本)

臺灣大通書局印行

弁言

「聖安本紀」有兩個本子，都是記南明弘光一朝史事的：一個是二卷本，見於「亭林遺書彙輯」和「明季稗史」；一個是六卷本，見於「荊駝逸史」。六卷本有「發明」和「附錄」，記事較詳。二卷本舊題「顧炎武撰」；六卷本舊題「崑山遺民寧人顧炎武著」，前面還有亭林自撰的序文。但據謝國楨的「晚明史籍考」說：六卷本「乃文秉之「甲乙事案」，後人誤爲一書；書前自序，卽竹塢遺民之自序也」。現在姑且依照舊題，把這兩種「聖安本紀」印在一起，先二卷本、次六卷本。

按本叢刊已經刊出的「明季三朝野史」，亦題「崑山顧炎武亭林氏編輯」。其第一、二卷「聖安紀略」的文字與「聖安本紀」二卷不同，不知這部「三朝野史」是否眞爲亭林所輯？

另有「隆武遺事」一卷，見於「痛史」，無撰人名氏。因爲字數少，不能印成專冊，就附錄在「聖安本紀」的後面。（百吉）

臺灣文獻叢刊第一八三種

聖安本紀

顧炎武

目錄

聖安本紀（二卷本）	（一）
聖安本紀（六卷本）	（三）
隆武遺事	（一〇四）

聖安本紀

聖安本紀上

顧炎武撰

聖安皇帝，神宗顯皇帝第二子福恭王之長子，諱由崧，母曰某氏。初封德昌王，進封世子。崇禎十四年正月，李自成陷河南府，恭王薨，世子出走懷慶；十六年七月，嗣封福王。

十七年三月，京師失守；四月己巳，烈皇帝凶問至南京。其時，南京參贊機務兵部尙書史可法督師勤王在浦口。南京諸大臣聞變，倉卒議立君，未有所屬；而王與潞王以避賊至淮上，大臣意多在潞王。總督鳳陽兵部右侍郎兼都察院左僉都御史馬士英遺書南京，言福王神宗之孫，序當立。甲申，守備南京魏國公徐弘基、提督操江誠意伯劉孔昭等、南京戶部尙書高弘圖、工部尙書程註、都察院右都御史張愼言、掌翰林院事詹事府詹事兼侍讀學士姜曰廣等、南京守備掌南司禮監務太監韓贊周等集朝內，兵部右侍郎呂大器署禮、兵二部印，不肯下筆；吏科給事中李沾厲聲言：『今日有異議者死之！』時士英握兵於外，與大將靖南伯黃得功、總兵官劉澤清、劉良佐、高傑等相結；諸大將連兵駐江北，勢甚張，大臣畏之，不敢違。於是以福王告廟。

乙酉，弘基等迎王於江浦。丙戌，王舟次燕子磯。丁亥，百官迎見於龍江關；王素

衣角帶哭。五月戊子朔，王乘馬自三山門外至孝陵。從臣請自東門御路入，王遜避，自西門入。至饗殿拜謁畢，次謁懿文太子陵。自朝陽門入東華門，步行謁奉先殿；出西華門，駐蹕於內守備府。

己丑，群臣勸進，王辭讓；遵景帝故事，以福王監國。是日，清墨勒根入北京。

庚寅，王行告天禮，升殿，百官行四拜禮。魏國公徐弘基跪進監國之寶，王受訖，再行四拜禮，乃退。大赦天下；其新加練餉及十二年以後一切雜派並各項錢糧、十四年以前實欠在民者，悉免之。以張愼言爲吏部尚書。壬辰，以史可法爲東閣大學士兼兵部尚書、高弘圖爲東閣大學士兼禮部尚書，並入閣辦事；馬士英爲東閣大學士兼兵部尚書都察院右都御史，仍總督鳳陽等處地方軍務（時朝廷草創，大僚無通曉故事者，以學士兼尚書，非制也）。發銀一萬兩，遣職方司郎中萬元吉往犒得功等軍。以張應元充總兵官，鎮守承天等處地方。癸巳，爲大行皇帝舉哀哭臨。甲午，以姜曰廣爲東閣大學士兼禮部尚書、前禮部尚書王鐸爲東閣大學士，並入閣辦事。曰廣辭，改禮部左侍郎入直。以工部左侍郎周堪賡爲戶部尚書。乙未，召前都察院左都御史劉宗周復官。遣御史祁彪佳等安撫江南、北等處地方。

可法請分江北爲四鎮，以黃得功、劉澤清、劉良佐、高傑四人分統之。傑駐徐州，轄徐州及鳳陽之懷遠、五河、虹、泗州、盱眙、宿州、靈璧、蒙城、亳州十四州縣，經

理河北、河南開、歸等處招討事；良佐駐壽州，轄鳳陽之鳳陽、臨淮、定遠、壽州、霍丘、潁州、潁上、太和、廬州之六安州九州縣，經理河南陳、許等處招討事；澤清駐淮安，轄十一州縣，經理山東等處招討事；得功駐廬州，轄廬州之合肥、巢、無爲州、滁、和二州、應天之江浦、六合十州縣，經理各路援剿事：一切軍民皆聽統轄，州縣有司皆聽節制，營衛原本舊兵皆聽歸併整理，荒蕪田土皆聽開墾，山澤有利皆聽開採。仍許各於境內招商收稅，以供軍前買馬置器之用。每鎮額定三萬人，歲供本色米二十萬、折色銀四十萬。其體統照山海經理鎮、各處提督鎮行事。所收中原城池，卽歸統轄；寰宇恢復，爵爲上公，與開國元勳同准世襲。其鳳陽舊有總兵官應罷，改副將一員。又言操江舊兵單弱，請添設九江、京口兩鎮，以操江、總督文臣協理。並從之。而得功等方各擁兵爭江北諸郡；傑圍揚州，縱兵大掠，且欲渡江而南。可法乃奏設督師於揚州，節制諸將。

馬士英以麾下兵至江干，上疏勸進。丙申，召士英入京。戊戌，群臣勸進至再三，王乃許之。

己亥，可法自請督師江北，詔以便宣行事，各鎮並聽節制。撫寧侯朱國弼請裁漕鎮，從之。召兵部尙書張國維以原官回部，佐理戎政。召前刑部尙書徐石麟爲都察院右都御史。以□□□鄭鴻達爲後軍都督府署都督僉事，充總兵官，鎮守九江等處地方；□

□□□黃蜚以原官鎮守京口等處地方。以韓贊周爲司禮監秉筆太監。

壬寅，王卽皇帝位，大赦天下；以明年爲弘光元年。在京文武各官普加一級，無級可加者進勳階一級，並給新銜誥命。在外督撫監司守令，並依見任官銜給與誥命。在籍閣臣及六部堂上官，年六十以上者存問，其遣配及閒住者並復原官。三品以下先行釋罪，分別酌用。其北直隸、山東、河南、山西、陝西、遼東等處文武官生義不從賊在南者，文官察明起用，生員赴禮部報名取印結寄應天府學考試；武官指揮千百戶等赴兵部察驗，附在京各衛寄俸。弘光元年糧免十分之一；北直隸、山西、陝西全免五年，山東、河南全免三年，江北、湖廣免十分之五，四川免十分之三。以盧九德爲司禮監秉筆太監，提督京營。癸卯，以馬士英掌兵部事，仍入閣辦事；以禮部右侍郎顧錫疇爲禮部尚書兼翰林院侍讀學士。分應天、蘇松爲二巡撫。以太常寺少卿左懋第爲都察院右僉都御史，巡撫應、安、徽、寧、池、太、廣德等處地方，提督軍務兼理糧儲。甲辰，以忻城伯趙之龍總督京營戎政。以前都察院右僉都御史田仰巡撫淮、揚等處地方，提督軍務兼理海防。進封黃得功爲靖南侯、左良玉爲寧南侯，仍各廕一子錦衣衛千戶世襲；封高傑爲興平伯、劉澤清爲東平伯、劉良佐爲廣昌伯。加馬士英太子太保，廕一子錦衣衛指揮僉事世襲。乙巳，以大理寺左寺丞祁彪佳爲都察院右僉都御史，巡撫蘇松等處地方，總督糧儲、提督軍務。禁北來逃官不許入京。丁未，可法出京督師，給銀二十萬兩。密諭

參將王之綱等迎母妃於江北郭家寨。

李自成遣僞制將軍董學禮等率兵南下，至宿遷；己酉，總督漕運巡撫鳳陽等處地方都察院右僉都御史路振飛遣兵擊敗之，擒其僞防禦使武懋。

張愼言薦前東閣大學士遣戍吳姓，命召之。庚戌朝，劉孔昭廷訐愼言薦誤國罪臣，且定策時有二心；聲色俱厲。御史王孫蕃等亦劾孔昭，交爭於上前。上諭之，乃退。明日，孔昭具疏論劾，愼言乞罷；上兩解之。弘圖、曰廣各上疏乞罷，不許。以萬元吉爲太僕寺少卿，監江北軍。命御史周一敬護送潞王於杭州居住。設勇衛營，以御馬監太監李國輔監督。

壬子，進魏國公徐弘基、南和伯方一元、誠意伯劉孔昭、撫寧侯朱國弼、安遠侯柳祚昌、靈璧侯湯國祚、東寧伯焦夢熊、成安伯郭祚永各官銜二級，歲加祿米五十石；弘基仍進左柱國。賜韓贊周廕弟姪二人、盧九德一人錦衣衛指揮僉事世襲，仍賜蟒衣及銀。癸丑，可法奏先帝已封劉澤清伯爵，命加廕一子錦衣衛正千戶世襲。甲寅，遣督師大學士史可法祭告祖陵、皇陵，寧南侯左良玉祭告顯陵。

先是，賊陷京師，定遠總兵官平西伯吳三桂降於清，引之入關，大敗自成於一片石，自成走西安；清乃僞稱太子，與三桂合軍入京。及至，則清九王也；遂據京師，爲先帝發喪，傳檄河北、山東皆下之。而道路相傳以爲三桂借兵克復，又言巡撫遼東都察院

右副都御史黎玉田與三桂合謀。德州生員謝陞殺賊所署僞防禦使吳徵文，奉香河知縣宗室帥鋤爲濟王，率士民城守；而傳以爲前東閣大學士謝陞及前御史盧世潛，於是可法以聞。己卯，封三桂薊國公世襲，命發銀五萬兩、漕米十萬石饋之。

太常寺少卿李沾劾吏部左侍郎呂大器定策時懷二心。上曰：『朕遭時不造，痛深君父，何心大寶？直以宗社攸關，勉承重任。當日効忠定策諸臣，朕已鑒知，餘不必深求』。大器乞罷，不許。

六月庚申，以福府千戶常應儒爲中軍都督府左都督。壬戌，上大行皇帝諡曰「紹天繹道、剛明恪儉、揆文奮武、敦仁懋孝烈皇帝」，廟號「思宗」；大行皇后諡曰「孝節貞肅、淵恭莊毅、奉天靖聖烈皇后」（「思」字，大學士弘圖所擬也）。以都督同知楊振宗充總兵官，鎮守安慶。癸亥，以右軍都督府都督僉事趙光遠爲都督同知，充總兵官，提督四川、陝西軍務。光遠時鎮守漢中，命未至，已降於賊。甲子，工部尙書程註致仕。丙寅，吏部尙書張慎言致仕。

士英薦前光祿寺卿阮大鍼可任樞貳，予冠帶召見。戶科左給事中羅萬象、御史詹兆恒、王孫蕃、陳良弼、應天府丞郭維經等交章言大鍼以逆案發配，不宜召；弘圖請下九卿議，與士英不合，各疏求去，不許。呂大器遂劾士英以入朝爲名，橫據國中縱兵劫掠、賣官鬻爵諸罪。御史黃澍入對，廷劾士英。司禮監太監何志孔助澍言之，上怒。士

英更爲志孔請，得不死。

先是，張獻忠自楚入蜀；己巳，陷涪州。

壬申，士英劾從逆諸臣光時亨、龔鼎孳、陳名夏、項煜、周鍾等。

先是，周王薨於淮安舟中，命於安吉、孝豐擇地卜葬。

丙子，劉澤清劾呂大器前巡撫甘肅，以私忿殺總兵官柴時華及受賄事。大器連疏引疾，致仕。

朝議遣大臣北行使清，訪先帝梓宮並賫敕與吳三桂。而士英言有職方司員外馬紹愉者，曾爲陳新甲使清；昔之下策，今之上策也。澤清、傑並舉前總兵官太子少師左都督陳洪範；召見，以陳洪範提督下江定海水師，駐瓜洲。會左懋第以母喪在山東，請北行；遂定使清之議。

丁丑，張獻忠陷重慶府，瑞王遇害。

戊寅，封常應儁襄衛伯，食祿米一千石，世襲。劉宗周在籍自稱「草莽孤臣」，上疏請上親征，又言四鎮不宜封；有旨宣付史館。而宗周復連疏言中外諸臣皆可誅，於是四鎮皆怒。己卯，忻城伯趙之龍論先帝廟號「思宗」爲下諡；弘圖疏辯，上是之。

辛巳，以徐石麒爲吏部尙書、工部左侍郎何應瑞爲工部尙書。以巡按淮揚御史王燮爲都察院右僉都御史，贊理軍務、巡撫山東。壬午，以江西按察司副使程世昌爲都察院

右僉都御史，巡撫應天等處地方。加謝陞上柱國少師兼太子太師、禮部尚書，黎玉田兵部尚書，盧世淮工部右侍郎，俱充山陵使。王燮奏皇太子、定王、永王俱遇害。是日，督師標下總兵官于永綬等兵及浙兵闕於鎮江西門，焚居民數百家。

癸未，顧錫疇奏奪故少師兼中極殿大學士溫體仁諡。甲申，以□□□□邱磊充總兵官，鎮守山東。大學士高弘圖等奏北使事宜：一、於天壽山特立園陵，厝先帝梓宮並太子、二王神櫬；一、割山海關外地與清；一、歲幣以十萬爲率；一、清已僭號，勢成敵國，或稱可汗、或稱金國主，前代多有之，乞下廷臣集議；一、洪範給銀三萬兩，爲山陵及道里諸費。

秋七月丙戌朔，命魯王於台州府居住。添設兵部侍郎二員。加張慎言、程註太子太保。

戊子，追尊皇考福恭王曰「貞純肅哲、聖敬仁毅恭皇帝」，皇妣某氏曰「孝誠端惠、慈順貞穆皇太后」，皇祖妣貴妃鄭氏曰「孝寧溫穆、莊惠慈懿、憲天裕聖太皇太后」，（皇太后、太皇太后，生稱也；沒而加之，非名也）。遙上母太妃鄒氏尊號曰「恪貞仁壽皇太后」。諡先妃黃氏曰「孝哲懿莊、溫貞仁靖皇后」，繼妃李氏曰「孝義端仁、肅明貞潔皇后」。追復懿文皇太子廟諡曰「興宗孝康皇帝」，懿敬皇太子妃常氏曰「孝康皇后」。上建文帝諡曰「嗣天章道、誠懿淵恭、覲文揚武、克純（一作仁）篤孝讓皇帝」，廟

號「惠宗」；建文帝后馬氏曰「孝感溫貞、哲睿肅烈、襄天弼聖讓皇后」。追遵恭仁康定景皇帝諡曰「符天建道、恭仁康定、隆文布武、顯德崇孝景皇帝」，廟號「代宗」；貞惠安和景皇后汪氏曰「孝淵肅懿、貞惠安和、輔天恭聖景皇后」。

庚寅，以左懋第爲兵部右侍郎兼都察院右僉都御史，經理河北、聯絡關東軍務；馬紹愉爲太僕寺少卿，兼兵部職方司郎中；加陳洪範太子太傅；往北京。癸巳，以巡按四川御史劉之勃爲都察院右僉都御史，巡撫四川。罷貴州總督，以前屯田道參議范鏞爲都察院右僉都御史，巡撫貴州。命田仰仍總漕務，專管江北漕額，並催江北各標應給漕米。甲午，以前兵部尙書丁啓睿安撫河南，賜□□□李際遇、劉洪起各總兵官敕。乙未，依北京更定營制爲五軍、神機三大營，各一營至十營；以團練總兵官六人分統之。庚子，萬壽節。癸卯，命禮部尙書顧錫疇祀海。甲辰，追賜故潁國公傅友德、宋國公馮勝諡。乙巳，李自成遣兵至保寧府，降之。庚戌，中旨以吏部右侍郎張有譽爲戶部尙書；弘圖封還爭之，不聽。辛亥，釋高牆罪宗唐王聿鍵等三百餘人。

壬子，諭曰：『朕遭九六之運，車書間阻，方資群策，旋軫故都；乃文武之交爭，致異同之日甚。先皇帝神資獨斷，彙納衆流；天不降康，咎豈在上？爾諸臣尙鑒於前車，精白乃心，匡復王室。若水火不化、戈矛轉興，天下事不堪再壞，且視朕爲何如主！祖宗成憲，弗尙姑息，各宜欽承朕言！』不再改正閣銜，以尙書兼大學士。萬元吉奏有

清平西王吳三桂牌至濟寧州，稱奉大清攝政王旨，兵將南侵。執政謂款使已行，不以爲意。

八月丙辰朔，日食。

戊午，罷偏沅巡撫，以前都察院右僉都御史楊鶚爲兵部右侍郎兼都察院右僉都御史，總督四川、湖廣、雲南、貴州、廣西軍務兼理糧餉。辛酉，加可法少保兼太子太保，進武英殿大學士，廕一子錦衣衛指揮僉事世襲；弘圖太子少保，進文淵閣大學士；曰廣太子少保，進文淵閣大學士；士英太子太師，進武英殿大學士；鐸太子少保，進文淵閣大學士，改戶部尙書；各廕一子中書舍人。以刑部左侍郎賀世壽爲戶部尙書兼都察院右副都御史，總督倉場；以前薊遼總督丁魁楚爲兵部右侍郎兼都察院右僉都御史，總督河南、湖廣軍務，巡撫承德、襄陽等處地方兼理糧餉。癸亥，贈傅友德特進光祿大夫、左柱國、麗江王，馮勝特進光祿大夫、左柱國、寧陵王；祀功臣廟。敕左良玉充提督官，開藩武昌。

甲子，張獻忠陷成都府，蜀王遇害。

戊辰，皇太后自儀鳳門入宮，遣靈璧侯湯國祚告於南郊。命惠王於廣信府居住。壬申，以前寧夏巡撫樊一蘅爲兵部右侍郎兼都察院右僉都御史，總督川、陝等處恢剿軍務兼理糧餉；前□□按察司僉事充爲事官越其杰爲都察院右僉都御史，巡撫河南兼轄潁、

寧二州，提督軍務。

傑、澤清、良佐各疏劾劉宗周激變軍情，動搖聖駕；又與得功合疏言群臣謀危社稷，指大學士姜曰廣。會有建安王府鎮國中尉朱統_○候考吏部，因奏曰廣定策時有異謀，並劾前山東按察司僉事雷縉祚、儀制司員外周鑣結黨亂政；下縉祚等獄。於是吏科右給事中熊汝霖劾統_○誣詆大臣，通政使劉士禎、禮科給事中袁彭年劾統_○違制越奏，請究問；不聽；曰廣求去益力。

癸酉，命修西宮之西花園第一所爲皇太后宮。丁丑，贈吳三桂父故_{□□}總兵官吳襄遼國公、母祖氏遼國夫人。戊寅，以前總督薊遼軍務爲事官王永吉戴重罪總督山東、河北等處軍務。庚辰，命選淑女。辛巳，賜北京死節諸臣工部尙書兼東閣大學士范景文等二十二人贈諡、祭葬有差；建祠雞鳴山，賜額「旌忠」。癸未，封_{□□□□□□}鄭芝龍爲南安伯。以前福建布政使司左布政使申紹芳爲戶部右侍郎兼都察院右僉都御史，督餉江北。以前太子太保禮部尙書兼文淵閣大學士王應熊改兵部尙書，總督川、湖、雲、貴等處，專辦蜀寇；賜尙方劍一口、便宜行事，仍給銀三萬兩。乙酉，以皇太后至京，加可法少傅兼太子太傅，弘圖、曰廣各太子太保，士英少保兼太子太師，鐸太子少保，誠意伯劉孔昭等、太監韓贊周等各廕陞有差。阮大鍼入對稱旨，疏陳江防甚悉，安遠侯柳祚昌復薦之；以爲兵部右侍郎，巡閱江務。都察院左都御史劉宗周劾奏，不聽。

自李自成敗走，山東諸州縣並殺其僞防禦使，牧令復爲明；而朝廷無一官一兵出河北，清遂安置官屬，至濟、兗以南皆降於清，惟濟定州不下。是月，清將楊方興以兵數千趨濟寧，下之。

九月戊子，封皇太后弟千戶鄒存義爲大興伯。庚寅，以都督僉事張福成充總兵官，前往河北、山東。辛卯，上御經筵。壬辰，裁各布政使司右布政使。甲午，曰廣致仕。乙未，宗周致仕。命黃斌卿移屯九江、黃蜚屯蕪湖采石、鄭鴻達屯鎮江。丁酉，以中軍都督府都督同知王之綱充總兵官挂盪寇將軍印，鎮守河南。

己亥，三法司奏定從逆六等條例。大逆凌遲處死凡五條：凡從賊攻陷京師及爲賊毀宗社、易門榜者，凡倡率勸進及爲賊草僞詔者，凡部院詹事翰林三品以上大臣從賊受官爲之親信用事者，凡文武封疆大吏如督撫總兵降賊者，凡京堂翰林科道部等官爲賊畫策規取地方者。以上如本犯不歸、歸而又逃者，收繫其妻子，籍沒其資產。斬決不待時凡三條：凡四五品京堂及翰林科道官受賊僞命居要地比原職加崇者，凡方面分巡分守知府等官降賊者，凡文武封疆大吏聞變先逃者。絞凡六條：凡獻銀獻女獻婢以媚賊求免者，凡內外衙門官但受僞命者，凡職在巡方遇變而逃者及布按三司分巡分守知府等官遇變逃者，凡被賊夾打不能自回仍受僞官者，凡受僞官爲賊疏遠者，凡各衙門奉差如管屯管河權關司餉等官雖無封疆之責而逃者。流凡二條：凡內閣重臣及部院寺三品以上、詹事翰